

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

30 Octobre 2020

13 Rabi'ul Awwal 1442 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Du'ahs (Invocations) (Pt. 17)



Alhamdulillah, Summa Alhamdulillah, par la grâce d'Allah mo continuer mo Khutba aujourd'hui lors bane « *du'ahs révéle* ». Ki Allah ranne nous la vie meilleure par donne nous So proximité. Ki Li montrer nous le chemin ki amène vers Li et le moyen pou approche nous de Li. *Ameen, Summa Ameen*.

Voici bane *du'ahs* révéle du 01 au 04 Avril 2004 pendant le *Safar Zikrullah* :

Ô Allah ! Faire ki mo content la foi et magnifier-li [augmente-li] dans mo lé cœur ; Faire ki mo détester l'impunité, la débauche et la désobéissance. Faire ki mo vine au nombre de To bane serviteurs éclairé.

Ô Allah ! Épargne-moi de To punition le jour kot To pou ressuscite To bane serviteurs.

Ô Allah ! Ki mo lé corps, mo la vie et mo lé cœur zot être offerts en sacrifice zis avec Toi. D'après saki mo conner, pas ena aucaine Bien-Aimé [excepter Toi]! Ki tous bane parcelles de mo être [en entier] sacrifier pou Toi.

Ô mo Maître ! Accorde-moi tous bane excellent bienfaits de sa l'époque [présent] là.

Ô Allah ! Vine prend bane nouvelles de sa la voix ki pé appelle Toi là [Jette ene coup d'œil lors sa la voix ki pé appelle Toi Ô Allah]. Si To pas vine couma ene Camarade pour moi, mo la tête pou anéanti en poussière. Avec la main de To la grâce, aide-moi afin ki mo capave dirige bane dimounes pour ki zot capave conne Toi.

Ô Allah ! Pardonne-moi mo bane péchés afin ki bane l'ennemis maudits de la Religion [l'Islam] pas réjouir.

Ô Allah ! Applique lors mo bane blessures ene remède. Mo plongé dans le gouffre [trou] de la souffrance, écoute mo bane supplications. Mo fine être réduit à l'impuissance.

Ô mo lé Roi ! Accorde-moi la victoire ; eski To pou laisse moi dormi [pour l'éternité] avant ki mo atteigne mo but ? Ô Allah ! Mo pas attane sa de Toi.

Ô Allah ! Faire pleuvoir To la grâce lors le Jamaat... - **Jamaat Ul Sahih Al Islam** [Par la révélation Divine, To ti au commencement donne le nom de sa Jamaat là, et aujourd'hui nous capave dire c'est la **Jamaat Ul Sahih Al Islam** couma To fine par la suite révélé], et écoute bane supplications de so bane adhérents ; bane ki objecter [contre la Manifestation Divine, contre To Messenger] zot formente zis le mal. De tous parts, ena la tristesse et découragement. C'est ene la nuit ki bien obscure. Sans de l'eau de To part, le monde li voué à la mort. Le printemps fine faire place à l'automne.

Ô Allah ! Sans Toi, pas ena aucune chemin sorti. Le jardin de *Taqwa* (la crainte révérencielle pou Allah) fine alle en flammes, et la Religion [l'islam] fine vine ene commerce.

Ô mo Bien-Aimé ! N'importe ki pou arriver, pour le travail [ou plan ki vine] de To la main sinon le mal pé répanne rapidement. Rende apparent ene de To bane signes paski la Religion li dépourvu de sa. Jette ene regard de sa côté-là afin ki quelqu'un capave manifester le signe du printemps.

Ô Allah ! Apporte ene changement à sa bane jours là, puisque To le Maître de l'Univers, le Roi de tout saki exister. Nannié pas impossible pou Toi- pou donne la mort à quelqu'un ou sois pou garde li en vie. C'est dans To pouvoir pou faire bouge bane kitchoses. Kan To grâce présent, bane travail non-terminer zot terminer. Si travail là terminer, To ena aussi le pouvoir pou réduire li à néant [pou anéanti li].

Ô mo Bien-Aimé ! Dire-moi saki pou faire Toi content ; c'est ene jour merveilleux, le jour kot nous tous pou retourne vers Toi. Comme Toi, mo moi aussi éloigné de bane dimounes. Mo lé cœur pas cachiette aucune secret.

Ô Allah ! Accorde-moi la volonté et le courage ki pou permette moi pou vine ene amoureux de la Religion. Allume dans mo lé cœur le feu de la rencontre [avec Toi], et ki so bane la flammes éléver ziska lé ciel.

Ô Allah ! Guette nous l'état d'anéantissement ; tout capacité fine quitte nous. Accompli ene miracle, et dirige bane dimounes vers le Quran. Accorde zot la force de compréhension. Le jardin fine sec, et bane z'arbres fine perdi zot bane fruits. Par la Manifestation Divine, bane z'arbres pou produire à nouveau bane fruits. Le remède de Issa fine guéri seulement Issa, mais par la Manifestation Divine, tous bane pays pou être sauvé du mal.

Maintenant mo présente ou bane *duahs* révélé le premier jour de Roza de Ramzaan de sa l'année là – le 25 Avril 2020 :

Ô Allah ! To pur et To pas manque nannié.

Ô Allah ! Nous bane pécheurs, bane fautifs, combler-nous de To bane faveurs. Ô Allah ! Protège-nous bien ; Ô Le Pardonneur ! Le Miséricordieux ! Pardonne tous nous bane péchés, grands et petits ; Ô Allah ! Accorde-nous la faveur d'ene repentir sincère. Ô Allah ! Le Pardonneur ! Nous bane accusés, nous fine commette beaucoup de péchés, mais néanmoins, nous pé demande Toi pou pardonne nous et pour être indulgent envers nous.

Ô Allah ! Le Maître, Le Miséricordieux ! Accepter nous bane *Ibaadat* imparfaits par To bonté et To grâce.

Ô Allah ! Pardonne-nous pour tous bane torts ki nous fine commette dans nous *Salaat*, nous bane *Roza*, nous bane l'aumônes, nous bane *Zakaat* et *Sadaqaat*, nous Hajj et dans bane les autres *Ibaadat*.

Ô Maître de l'Univers ! Satan et nous bane passions personnelles fine trompe nous beaucoup dans le passé ; alors protège-nous contre zot dans l'avenir.

Ô Celui Qui donne nous, nous nourriture ! Verse To bane bénédictions dans nous bane commerces, dans nous bane moyens de subsistance, protège-nous de tous bane déficits.

Ô nous Gardien ! Protège nous la vie, nous bane dibiens, nous l'honneur, nous bane la cazes et tous bane membres du Jamaat Ul Sahih Al Islam en entier.

Ô Celui Qui garde nous dans le droit chemin ! Faire ki nous bane femmes, nous bane zenfants, nous bane familles vine bane dimounes vertueux, ki zot pratique la religion de l'Islam, ki nous bane zenfants vine la fraîcheur de nous liziés, ki zot rehausse nous prestige et vine le moyen de salut dans l'au-delà.

Ô Le Plus Juste de bane Juges ! Protège-nous de cruautés de bane tyrans et aide bane opprimés.

Ô Celui Qui détenir tous bane pouvoirs ! Protège-nous contre la jalousie et bane méchancetés de nous bane l'ennemis, et guide vers le droit chemin bane ki ouler faire nous ditort et secours-nous par bane moyens invisibles.

Ô Le Pardonneur ! Le Miséricordieux ! Protège-nous de bane calamités, de bane maladies mortelles, de bane Jinns, de bane Satans et de bane ditorts de bane dimounes ki faire le mal.

Ô Maître [Ô mo Rab, Ô mo Maître] ! Nous bien faibles pour supporte bane épreuves ; gagne pitié de nous, crée vraie l'amitié et *Muhabbat* (l'amour) parmi nous bane frères et sœurs, parents et zenfants, entre maris et femmes, résoudre tous nous bane problèmes domestiques, verse To bane bénédictions lors nous, préserve-nous de bane maladies, donne la santé à bane ki malades, aide bane ki endetté afin ki zot capave acquitte zot de zot bane dettes.

Ô Roi de l'Univers ! Pardonne nous bane morts, et admette zot dans le « *Jannatul Firdaus* » (Séjour de bane bienheureux).

Ô Celui Qui détenir le pouvoir Absolu ! Éloigne tous nous bane tracas et faire tous nous bane bons désirs réaliser.

Ô Celui Qui arrange bane destins ! Arrange nous destins parfaitement.

Ô Le Roi de tous bane les rois ! Éloigne tous bane difficultés ki entoure nous.

Ô Celui Qui change bane situations ! Dirige nous situation vers le bien.

Ô mo Bien-Aimé, Toi Qui fine choisir moi comme le Khalifatullah – comme To Calife, To fine révèle moi ki bientôt mo bizin quitte ici pour alle émigrer moi dans ene l'autre pays, entouré de mo bane disciples sincères, loyals, dévoués ki pou travaille ensam avec moi et montrer ene l'obéissance totale envers To Khalifatullah ; bane ki pou travaille corps et âmes avec beaucoup de contentement et ki pou senti zot heureux ki le Messenger d'Allah parmi zot. Bane jours là pou vine bien vite, Ô mo Créateur ! Béni mo bane disciples, donne-zot la paix, la tranquillité, et la satisfaction. Protège-zot contre bane cruautés de bane tyrans et réhausse zot prestige et accorde-zot ene faveur immense.

Ô Maître de tous bane les mondes ! To possède bane connaissances sans limite. Nous demande Toi pou faire tout saki bon pour nous et pou éloigne nous de tous bane mauvais kitchoses ; Donne-nous la paix, la tranquillité et la satisfaction de saki To donne nous. Ô Celui Qui Immortel ! Épargne-nous d'ene mauvais la mort,

faire-nous mort avec la foi (*Imaan*), et protège-nous contre l'humiliation le jour de la Résurrection.

Ô Celui Qui Pardonne ! To Le Seul Qui pas manque nannié ditout, To Le Miséricordieux.

Ô Allah ! Mo supplier Toi pou acorde moi la foi et le rang de *Siddiq* (Véridique), et place dans mo lé cœur ene l'espérance et désir infini, ene plaisir extrême ki pou faire rayonne d'avantage sak la bougie lors la terre. Et même si mo lé corps pas encore paraite devant Toi, mo remercier Toi, Ô mo Créateur ki To fine permette à mo l'âme pou paraite devant Toi.

Ô Allah ! Donne-nous d'abord vraie la foi tout au long d'ene la vie bien rempli, ki rempli de succès et de prospérité, et guide-nous Ô Rab d'ene pas ferme dans le *Deen*. Quand nous pou affronte bane horreurs du *Qiyamat*, le Maître du Jour du Jugement avec Qui nous pou ena pou rendre nous comptes, pou préserve nous (de l'enfer) avec l'honneur et dignité.

Ô Allah ! Efface tous mo bane fautes et mo bane péchés. Ô Allah reconforte moi, console-moi, dirige-moi afin ki mo accompli bane bons travaux [bons actions] et ki mo ena ene bon caractère, parski personne aparte Toi pas capave dirige nous et personne aparte Toi pas pou capave enleve zot ditort excepter Toi.

Ô Allah ! place-nous parmi bane ki fine remette zot à Toi (*Al-Mustalimina ilayka*) et ki, kan zot tenir zot devant Toi, zot fine renonce à gouverner avec, ou bien contre Toi ; mette-nous au nombre de bane ki abandonne zot [zot être, zot volonté, tout zot la vie] à Toi (*Al-Mufawwidina ilayka*).

Insha-Allah, nous bizin lire tous sa bane *duahs* là tous les jours.

Maintenant mo raconte zot ene très joli rêve ki ene de nous bane *Mujtaba* dans Tamil Nadu, dans l'Inde fine faire sa semaine là. Ene petite fille, lynul Misbah fine rêvé ki so papa, mama et so frère ti dans la compagnie de beaucoup dimounes dans ene l'endroit et li ti pé tende zot tous crier le nom d'Allah en disant « *Naara-e-Takbeer, Allahu Akbar* ». Li fine demande ene dimoune: « *Kifaire zot pé crier (Naara-e-Takbeer, Allahu Akbar)?* »

Alors, li fine réponne li: « *Le Saint Prophète Hazrat Muhammad Mustafa (saws) pé vini* », mais pour ene moment li pas fine réussi trouve Hazrat Muhammad (saws). C'est ensuite après ene ti moment ki li fine réussi trouve li (saws). Hazrat Muhammad (saws) ti habiller en blanc et li ti lors so chameau et ti ena ene zoli ti tifille ki ti pé assizer derrière li (saws). Li aussi ti également habiller en blanc, dans ene joli robe blanc.

Et en plus de sa, lynul Misbah fine surpris ki li pas ti capave trouve le visage du Saint Prophète (saws) mais le reste de bane dimounes là-bas ki ti ensam avec li et so famille ti capave trouve joli visage de Hazrat Muhammad (saws). Alors li fine alle guette le Saint Prophète (saws) et fine demande li: « *Kifaire mo pas capave trouve ou visage?* »

Alors, le Saint Prophète Muhammad (saws) fine donne li la réponse suivante: « *Mo fine vini dans sa bane là zot génération (c'est-à-dire, bane dimounes ki ti avec li ki zot, zot ti pé trouve Hazrat Muhammad (saws)) et toi, to fine né dans ene génération différent. De ce fait, zot, zot capave trouve mo figure parski zot fine vivre avec moi, mais bane générations couma saki pour toi [bane générations futures] pou capave trouve mo visage dans Aakhirat.* » **Alhamdulillah, Insha-Allah.**

Mo terminer avec sa bane *duahs* ki ti révéle le 10 Mai 2001 :

Ô Allah, c'est Toi mo Guide,

Ô Allah, Toi Le Clément, Le Miséricordieux.

Mo To serviteur,

Montrer-moi pou conne Toi,

Montrer-moi pou content Toi,

Montrer-moi pou servi Toi,

Montrer-moi pou conne Toi dans mo conne mo bane frères,

Montrer-moi pou content Toi kan mo content mo bane frères.

Ô mo Créateur ! Faire ki mo trouve Toi et mo servi Toi à travers sakaine de To bane créatures.

Ô mo Créateur ! Faire dessane To *Sakinah* (tranquilité) dans mo lé cœur, afin ki mo la foi augmenter et produire bane fruits de patience, de persévérance, d'enthousiasme et de la joie.

Ô mo Créateur ! Augmente mo connaissance. Ki sa connaissance là [appliquer et] traduire par l'efficacité dans le service.

Ô mo Créateur ! Élargi le champs de mo l'amour, ki sa manifester par la fraternité agissante.

Ô mo Créateur ! To Le Vivant, Celui Qui conne tout [Celui Qui détenir tous bane connaissances]. Faire ki c'est To volonté ki primer et non pas mo propre volonté.

Ô mo Créateur ! Faire ki l'amour remplace l'égoïsme et ki tous bane dimounes gagne la capacité pou content les z'uns les z'autres. *Insha-Allah*.

Ô Allah ! Accepter nous bane *duahs*. *Ameen*.

Insha-Allah, mo pou contigner lors le même sujet de bane *duahs* révélé la semaine prochaine.